

Aras & Runa, 3j.



suechet zäme äs nöiis Daheime i Wohnigshautig

Liebi Tierfründe

Lueget einisch, sy mir nid zwöi ganz zwöi Hübschi? Eis wie's angeri, nur i grau u wiis. Mir sy zäme uf dr Suechi nach eme nöiie Daheime. Warum? Mir hei eigentlich e toues Daheime, we da nid die doofe Hüng wäre. Die mache üs so Angscht, mir troue üs scho lang nüm is Ärdgschoss. U die Hüng hei das erliggeret u mache üs itze grad no extra Angscht. Das sy chei Zueschtänd uf Duur, mir hätte so gärn eifach es ruhigs entschannts Daheime. Drum!

Mir sy 3jährig, Gschwüschterti u uuzertrännelech, kaschtriert, gimpft, chippet, schtuberein, gsung u fit u muntr. Mir sy lieb u guet erzoge, chratze u biisse nie. Nur s'Bürschtele geit so lälà, mängisch muesch haut es bitzeli mit dr Scheri nachhäufe. Mir liebe Schpiue u Schmüsele u sy sähr aahängelech. Dr grau Aras isch dr Chef, er isch nöigiirig uf aues u jäden. U er isch sähr verfresse, dört muesch es bitzeli ufasse. D'wiis Runa isch echener di Schüechi, sy bruucht Geduud u viu Ziit zum Aachoh. Sy frömdelt haut aafangs no ziemlech. Abr denn mag sy's ou, s'Chuschele. Sy schickt eifach ihren Brüetsch vor, der muess sy bschütze.

Mir zwöi wönnt unbedingt zäme bliibe u wünsche üs e ruhige Huushaut mit iifüelsami geduudigi Lüüt, die wo zu üs luege u viu Ziit mit üs verbringe möchte. Ching, Hung u angeri Chatze wönnt mir nid daheime. Nur Du u mir zwöi, das gnüegt üs. Du dörftisch ou zu zwöit sy, sy mir ja ou. Mir chenne d'Wohnig mit Baukon, ou das gnüegt üs vouchomme, mir hei chei Drang nach dusse z'gah, viu z'gfährlech, dusse git's ou Hüng! Abr e gsicherete Baukon, das muess sy, zum usse Luege u Sünnele u Vögeli beobachte. Hesch Du eine mit ere inträssante Uusicht? U isch bi Dir oft öpper diheime zum Schpiue u Schmüsele? Z'mindescht am Abig? U suechsch Du zwöi liebi pflägelichti Büsis zum Verwöhne? Ja? Denn chönnt das üses nöiis Daheime sy bi Dir, denn müesset mir üs unbedingt lehre chenne. Ah ja, mir wohne im Moment no z'Schwarzsee/FR, züggle aber gärn zu Dir, wo ou immer Du wohnsch. Mäud Di doch bitte ganz gly bi dr Sonja Ball. Sie het sich üs agno u suechet für üs das nöiie Plätzli. Mir fröie üs ganz fescht uf Di!

Dini Aras&Runa



Katze sucht Mensch – Mensch sucht Katze

Sonja Ball

Tel.Nr. 079 333 45 62 (Mo-Fr 18-20h)

kontakt@katze-sucht-mensch.ch